

Broj: 03-02/1-2387/22 AG  
Sarajevo, 04.08.2022. godine

**OBRTNIČKA KOMORA  
FEDERACIJE BOSNE I HERCEGOVINE**  
n/r gosp. Željko Babić, predsjednik  
ul. Stjepana Radića 76E  
88000 Mostar

**PREDMET:** Odgovor, dostavlja se

Federalnom ministarstvu rada i socijalne politike dostavljen je Vaš akt broj: 47-16-07/22 od 22.07.2022. godine, kojim je zatražena izmjena Zakona o zaštiti na radu ("Službene novine Federacije BiH", broj: 79/20), u pogledu primjene navedenog zakona na lica koja obavljaju obrtničku djelatnost, na način da se predvidi da i pomenuta lica poslove zaštite na radu mogu obavljati sami.

S tim u vezi, ističemo da je odredbom člana 22. tačka a) Zakona o zaštiti na radu propisano je da je poslodavac dužan da organizuje poslove sigurnosti i zaštite zdravlja na radu. Odredbom člana 33. pomenutog zakona propisano je da je poslodavac dužan organizovati poslove zaštite na radu vodeći računa o tehničko-tehnološkom procesu rada, broju radnika, broju lokacija odvojenih radnih jedinica, opasnostima i rizicima po zdravlje radnika. Ako se u nedostatku stručnog osoblja poslovi zaštite i prevencije ne mogu organizovati kod poslodavca, poslodavac će angažovati ovlaštenu organizaciju za zaštitu na radu. Ako poslodavac angažuje ovlaštenu organizaciju iz stava 2. ovog člana, dužan je da osigura uvid u podatke vezane za rizike po sigurnost i zdravlje na radu, kao i mjere i aktivnosti za sprječavanje tih rizika na nivou radnog mjesta. Poslove zaštite na radu poslodavac može da obavlja sam u djelatnostima trgovine, ugostiteljstva i turizma, finansijsko-tehničkih i poslovnih usluga, obrazovanja, nauke i informacija, zdravstvene i socijalne zaštite i u stambeno-komunalnim djelatnostima, ako ima do 30 radnika. Federalni ministar rada i socijalne politike propisat će uvjete koje mora ispunjavati stručno osoblje iz stava 2. ovog člana, kao i način i uvjete obavljanja poslova zaštite na radu kod poslodavca u zavisnosti od rizika, djelatnosti i broja radnika.

Dakle, navedenim zakonom je izričito predviđeno da će se podzakonskim aktom za čije je donošenje nadležan federalni ministar rada i socijalne politike, pored uvjeta koje mora ispunjavati pomenuto stručno osoblje, propisati način i uvjeti obavljanja poslova zaštite na radu kod poslodavca u zavisnosti od rizika, djelatnosti i broja radnika. S

obzirom da se rizici kod poslodavca u smislu navedenog ogledaju u postojanju utvrđenih poslova sa povećanim rizikom, u tom smislu je Pravilnikom o načinu i uvjetima obavljanja poslova zaštite na radu kod poslodavca („Službene novine Federacije BiH“, broj: 34/21), utvrđen način i uvjeti obavljanja poslova zaštite na radu kod poslodavca u zavisnosti od rizika, odnosno način obavljanja poslova zaštite na radu kod poslodavaca kod kojih ne postoje poslovi sa povećanim rizikom. Naime, članom 5. stav 1. navedenog pravilnika propisano je da poslove zaštite na radu poslodavac može da obavlja sam u djelatnostima trgovine, ugostiteljstva i turizma, finansijsko-tehničkih i poslovnih usluga, obrazovanja, nauke i informacija, zdravstvene i socijalne zaštite i u stambeno-komunalnim djelatnostima, kao i u drugim djelatnostima, ako ima do 30 radnika, te ukoliko je internim aktom o zaštiti na radu, a na osnovu akta o procjeni rizika, utvrđeno da kod poslodavca ne postoje poslovi sa povećanim rizikom.

S tim u vezi, nesporno je pored nabrojanih djelatnosti, poslodavci mogu da poslove zaštite na radu obavljaju sami i u drugim djelatnostima pod uvjetom da imaju do 30 radnika, te pod uvjetom da je internim aktom o zaštiti na radu, a na osnovu akta o procjeni rizika, utvrđeno da kod poslodavca ne postoje poslovi sa povećanim rizikom. U smislu navedenog ističemo da se odredba člana 5. stav 1. navedenog pravilnika, pod pomenutim uvjetima, može primijeniti i na lica koja obavljaju obrtničku, srodnu djelatnost i domaću radinost.

Imajući u vidu navedeno, obavještavamo Vas da je ovo ministarstvo koje je kao nadležni organ, u skladu sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj: 35/05), odgovorno za stanje u navedenoj oblasti, te koje može davati preporuke iz oblasti zakonodavstva u oblasti za koju je odgovorno, aktom broj: 03-02/1-1888/22 AG od 13.06.2022. godine, već dalo uputu za postupanje nadležnim inspekcijskim organima u smislu navedenog, kako ne bi došlo različitog postupanja prema licima koja obavljaju obrtničku, srodnu djelatnost i domaću radinost u pogledu organizovanja poslova zaštite na radu.

S poštovanjem,

